

## NASJONALT FAGRÅD FOR ENGELSK

Høgskulen i Volda

Engelskseksjonen

6100 Volda

Epost: [mns@hivolda.no](mailto:mns@hivolda.no)

Nettside: [www.hivolda.no/nfe](http://www.hivolda.no/nfe)

---

### Høyringsuttale til Kunnskapsdepartementet:

#### ***'Forslag til endringer i opplæringsloven og privatskoleloven. Kompetansekrav for undervisning med mer.'***

Nasjonalt fagråd for engelsk har ikkje fått tilsendt denne saka som første høyringsinstans, men sorterer under høyringsinstansen Universitets- og Høgskolerådet. Dessutan ser vi at departementet ber 'høyringsinstansene vurdere om saken bør forelegges underordnede organer som ikke er særskilt nevnt på listen'. På dette grunnlaget vil fagrådet kome med fylgjande uttale:

Nasjonalt fagråd for engelsk drøfta i møte 3.12.2010 spørsmålet om kompetansekrav for lærarar, med grunnlag i høyringsdokumentet frå Kunnskapsdepartementet, datert 19.10.2010. Del 2 'Kompetansekrav for undervisning' inneheld framlegg om krav om formell fagkompetanse i det ein lærar faktisk underviser i, i motsetnad til no, då kompetansekravet gjeld tilsetting. Fagrådet støttar dette kravet om kompetent undervisning i grunnskulen, men legg merke til at det ikkje gjeld engelsk på steg 1-7.

I punkt 2.4.1 er det framlegg om å innføre 30 studiepoeng fagutdanning for norsk/samisk og matematikk på barnesteget, og ingen krav i andre fag. Medan ein for ungdomssteget ynskjer 60 studiepoeng for å undervise i norsk/samisk, matematikk og engelsk, og 30 stp for andre fag. Fagrådet peiker på at engelsk er eit grunnleggande fag også på heile barnesteget, og at det også der bør bli sidestilt med norsk/samisk og matematikk når det gjeld kompetansekrav.

Det er i dag eit utbreidd problem at lærarar blir sett til å undervise i engelsk utan å ha god nok språk og fagkunnskap. Så lenge det ikkje er formelle kompetansekrav er det også eit lite mindretal av studentar i lærarutdanning som tek engelsk som fag, sjølv om mange faktisk må undervise i det når dei kjem ut i skulen.

Nasjonalt fagråd for engelsk ynskjer difor at 'Forslag til ny lovtekst' i 2.5.1 får tilføyinga 'og engelsk' slik at setninga blir: 'På årstrinna 1-7 kan det likevel undervisast i andre fag enn norsk/samisk, matematikk og engelsk utan slik fagkompetanse'.

**Volda, 8.1.2011**

**Marie Nedregotten Sørbo**

**Førsteamanuensis i engelsk ved Høgskulen i Volda**

**Leiar i Nasjonalt fagråd for engelsk**